



AVOKATI I POPULLIT

Adresa: Bulevardi: "Zhan D'Ark" Nr.2
Tiranë, Shqipëri



REPUBLIKA E SHQIPËRISË
AVOKATI I POPULLIT

Mekanizmi Kombëtar për Parandalimin e Torturës,
trajtimit ose dënimit të egër, çnjerëzor ose poshtërues

Tel/Fax: +355 4 2380 300/323

E-mail: ap@avokatipopullit.gov.al

www.avokatipopullit.gov.al

Nr. Prot.
Nr. Dok. 202300102/2

Tiranë ___/___/2023

Lënda: Rekomandime për inspektimin e kryer në ambientet e Komisarariatit të Policisë nr.1 Tiranë.

Drejtuar: z. Petrit HALO
Shef i Komisarariatit të Policisë nr.1 Tiranë

TIRANË

Për dijeni: Drejtues i parë z. Tonin VOCAJ
Drejtor i Drejtorisë Vendore të Policisë

TIRANË

Të nderuar,

Mekanizmi Kombëtar për Parandalimin e Torturës, trajtimit ose dënimit të egër, çnjerëzor ose poshtërues, në vijim Mekanizmi Kombëtar (MKPT), seksion pranë Avokatit të Popullit, bazuar në nenin 19/1 të ligjit nr.8454, datë 04.02.1999 "Për Avokatin e Popullit", i ndryshuar, kreu një inspektim në ambientet e shoqërimit të Komisarariatit të Policisë nr.1 Tiranë.

Inspektimi u krye në datën 01.02.2023, sipas një Plani Inspektimi të miratuar nga Avokati i Popullit. Në përbërje të grupit inspektues ishin z. Hazbi Selita dhe z. Besnik Deda me detyrë nd/komisionerë pranë Mekanizmit Kombëtar.

Qëllimi i inspektimit ishte vlerësimi i përgjithshëm i respektimit të të drejtave themelore të të shoqëruarve, të cilat ju garantohen në Kushtetutën e Republikës së Shqipërisë, Kodin e Procedurës Penale, ligjin nr.108/2014 "Për Policinë e Shtetit", i ndryshuar, si dhe në standardet ndërkombëtare për mbrojtjen e të drejtave themelore të personave të privuar nga liria.

Gjithashtu, u verifikuan procedurat që ndjekin punonjësit e policisë në zbatim të urdhrimit të Drejtorit të Përgjithshëm të Policisë së Shtetit nr.938, datë 24.07.2019 për miratimin e

procedurës standarde të punës “Rregullat teknike të shoqërimit në mjediset e Policisë së Shtetit”, si dhe zbatimi i rekomandimeve të Avokatit të Popullit të bëra gjatë inspektimeve të mëparshme.

Institucioni i Avokatit të Popullit, pasi u njoh me konstatimet e grupit inspektues dhe nivelin e zbatimit të rekomandimeve të bëra nga inspektimi i mëparshëm, ka detyrimin kushtetues dhe ligjor t’ju parashtrojë konkluzionet përfundimtare, si më poshtë vijon:

Shënime të përgjithshme

Në përputhje me metodologjinë e zhvillimit të inspektimit në institucionet ku mbahen e trajtohen shtetas të privuar nga liria, grupi i punës u takua me shefin e Komisarariatit të Policisë nr.1 Tiranë z. Petrit Halo, i cili u vu në dijeni lidhur me qëllimin e inspektimit.

Në vijim të takimit, shefi i komisarariatit informoi grupin e inspektimit, mbi masat e marra për realizimin e rekomandimeve të lëna nga Avokati i Popullit në inspektimin e mëparshëm, lidhur me përmirësimin sipas procedurave standarde të kushteve të dhomave të shoqërimit të këtij komisarati.

Grupi inspektues, pasi mori informacionin e nevojshëm lidhur me qëllimin e inspektimit, vijoi takimin edhe me punonjësit e policisë së zyrës së informacionit dhe të shërbimeve të tjera. Theksojmë se, shefi i komisarariatit dhe punonjësit e policisë u treguan bashkëpunues gjatë komunikimit dhe inspektimit, që zhvilloi grupi inspektues në ambientet e këtij komisarati.

Grupi i inspektimit, në vijim inspektoi dhomat e shoqërimit, zyrat e punës së punonjësve të policisë, si dhe u njoh me dokumentacionin përkatës ku pasqyroheshin veprimet e kryera me personat e shoqëruar në Komisaratin e Policisë nr.1 Tiranë.

Nga verifikimi i masave për zbatimin e rekomandimeve të Institucionit të Avokatit të Popullit në inspektimin e kryer në datë 12.07.2022, rezultoi¹ se:

1. ***Ishte zbatuar rekomandimi***, për mbylljen e dhomave të sigurisë ekzistuese në Komisaratin e Policisë nr.1 Tiranë, pasi ato nuk plotësonin kushtet dhe kriteret që garantojnë një trajtim njerëzor dhe dinjitoz të tyre, të përcaktuara në ligjin nr.108/2014 “Për Policinë e Shtetit”, i ndryshuar, urdhrin e Drejtorit të Përgjithshëm të Policisë së Shtetit nr.925, datë 18.07.2019, për miratimin e procedurës standarde “Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”, si dhe zbatimin e rekomandimit të Komitetit Europian për Parandalimin e Torturës (CPT).
2. ***Ishte zbatuar rekomandimi***, nga strukturat kompetente të Policisë së Shtetit, për nxjerrjen e përgjegjësive përkatëse, si dhe për dhënien e masave disiplinore ndaj personave përgjegjës në lidhje me mosmbylljen e dhomave të sigurisë së dyllosur, sipas procedurës standarde të urdhrin të Drejtorit të Përgjithshëm të Policisë së Shtetit.

¹ Shkresë nr.K4/I16-2 prot., datë 12.07.2022 “Rekomandim për inspektimin e kryer në Komisaratin e Policisë nr.1 Tiranë”.

3. ***Ishte zbatuar pjesërisht rekomandimi***, për ndërtimin e dhomave të shoqërimit në Komisarlatin e Policisë nr.1 Tiranë, sipas kritereve të parashikuara në Kreun VII, pika 4 e procedurave standarde “*Rregullat teknike të shoqërimit në polici*”, miratuar me urdhrin nr. 938, datë 24.07.2019 të Drejtorit të Përgjithshëm të Policisë së Shtetit duke përfshirë në të ndërtimin e ambienteve të përshtatshme, dinjitoze, të pajisura me orënditë e nevojshme për qëndrimin më vete për femra, meshkuj dhe të mitur në konflikt me ligjin.
4. ***Ishte zbatuar rekomandimi***, për ndërtimin e tualeteve të ndara më vete për femra dhe meshkuj, si dhe për pajisjen me mjetet e domosdoshme për këtë qëllim, brenda apo ngjitur me ambientin e shoqërimit të Komisarlatit të Policisë nr.1 Tiranë.
5. ***Ishte zbatuar rekomandimi***, për vënien dhe mbajtjen në funksion të plotë të sistemit audio-viziv me kamera në Komisarlatin e Policisë nr.1 Tiranë, i cili shërben për mbajtjen në vëzhgim të ambientit të shoqërimit dhe ambientit të sigurisë, si dhe për këqyrjen e veprimeve të punonjësve të policisë në dhomën e marrjes në pyetje apo gjatë intervistimit të personave që shoqërohen në mjediset e këtij komisarlati.
6. ***Ishte zbatuar rekomandimi***, për dhënien e kartës me të drejtat personave të shoqëruar, që në momentin e shoqërimit të tyre në mjediset e komisarlatit të policisë, si dhe vendosjen e posterave me të drejtat e personave të shoqëruar brenda në dhomat e shoqërimit, pasi nuk është efektive nëse janë të vendosura vetëm në korridorin e ambientit të shoqërimit.

Ndërkohë, grupi i inspektimit konstatoi se:

1. ***Nuk ishte plotësuar rekomandimi***, për krijimin e zyrës së intervistimit, për marrjen në pyetje të shtetasve të shoqëruar, gjatë kryerjes së veprimeve procedurale nga oficerët e policisë gjyqësore dhe instalimin e sistemit të monitorimit me kamera në këto zyra.
2. ***Nuk ishte zbatuar rekomandimi***, për krijimin e zyrave të posaçme për intervistimin e personave të mitur, duke ofruar një ambient të përshtatshëm, që duhet të jetë i rregulluar në mënyrë të posaçme për zhvillimin e bisedave me të miturit.
3. ***Nuk ishte zbatuar rekomandimi***, për sigurimin e sistemit të ngrohjes ose vendosjes së pajisjeve elektrike në dhomën e shoqërimit, për ngrohjen e këtyre ambienteve kryesisht në periudhën e dimrit.

Në përfundim të inspektimit, grupi inspektues vëren se megjithëse në Komisarlatin e Policisë nr.1 Tiranë ishin marrë disa masa për përmirësimin e standardeve lidhur me krijimin e dhomave të shoqërimit dhe të drejtat ligjore të personave të shoqëruar, nisur nga kushtet aktuale, vazhdonin të ishin të pranishme disa problematika dhe më konkretisht:

Ambientet e shoqërimit dhe kushtet e tyre

Në Komisarlatin e Policisë nr.1 Tiranë, ambienti i shoqërimit ishte ndërtuar pjesërisht sipas parashikimeve të bëra në ligjin nr.108/2014 “Për Policinë e Shtetit”, i ndryshuar, dhe

procedurës standarde “Rregullat teknike të shoqërimit në polici”, miratuar me urdhrin e Drejtorit të Përgjithshëm të Policisë së Shtetit nr.938, datë 24.07.2019².

Mjedisi i shoqërimit ndodhej në katin e parë të ndërtesës dhe kishte **4 (katër) dhoma shoqërimi**, të cilat ndaheshin në dy (2) dhoma shoqërimi për meshkujt madhorë, një (1) dhomë shoqërimi për gra dhe një (1) për të mitur.

Dhoma e shoqërimit ishte me sipërfaqe dhe hapësirë të bollshme për qëndrimin dhe trajtimin e të shoqëruarve. Ato ishin të pajisura me nga një stol të fiksuar në dysheme, të ngjitur me murin që mundësonit qëndrimin ulur për 4 persona të shoqëruar, por mungonin tavolina dhe karrige për qëndrimin e të shoqëruarve në këto ambiente. Përmasat e dhomave të shoqërimit ishin 4x5m me kapacitet për mbajtjen dhe qëndrimin ulur deri 5 persona.

Dritaret e dhomës së shoqërimit ishin me përmasa të tilla që lejonin mundësinë për ajrim dhe ndriçim të plotë natyral, si dhe kishin ndriçim nga rrjeti elektrik. Dhomat ishin të pastra nga ana higjieno-sanitare, por kishte nevojë për lyerje të tyre. Në pjesën e jashtme, dritaret ishin të siguruara me rrjetë të hollë teli, për arsye të sigurisë së personave që ndodhen në këto ambiente. Dhoma e shoqërimit nuk kishte sistem ngrohje/ftohje.

Në korridorin ku ndodheshin dhomat e shoqërimit, kishte 2 tualete për personat e shoqëruar. Tualetet ishin të pajisur me nyje hidrosanitare dhe furnizoheshin me ujë të rrjedhshëm pa ndërprerje nga rrjeti i UK Tiranë.

Në muret e korridorit të dhomave të shoqërimit u konstatuan ende skara hekuri të montuara, të mbetura nga koha kur ato dhoma ishin me destinacion si dhoma sigurie. Prezenca e skarave të hekurit në ambientin e shoqërimit, në pamje të parë përbën për personat e shoqëruar një formë presioni psikologjik dhe shërben si një premisë për vetëdëmtimin e personave të shoqëruar apo për kundërveprim ndaj punonjësve të policisë.

Në konceptin juridik, “**Shoqërimi**” është **veprimi administrativ**, me karakter detyrues (me ose pa vullnetin e personit që shoqërohet) dhe shtrëngues (qoftë edhe forcërisht), që kryhet nga punonjësi i policisë për dërgimin e shtetasit në ambientet e policisë ose në institucionet e tjera, sipas përcaktimeve dhe procedurave të parashikuara me ligj e aktet nënligjore.

Ekzistenca e një elementi shtrëngues në ushtrimin e kompetencave policore të shoqërimit për verifikim dhe të ushtrimit të kontrollit tregon një heqje lirie të personit, pavarësisht qëllimit të shoqërimit dhe se sa e shkurtër është koha e qëndrimit në mjediset e policisë të shtetasve. Në këto kushte, ambientet e shoqërimit në polici duhet të jenë të ndërtuara në proporcion të drejtë me veprimet administrative të kryera nga punonjësit e policisë. Konkretisht dhe në nenin 109 të ligjit nr.108/2014 “Për Policinë e Shtetit”, i ndryshuar,

² *Kreu VII, pika 4/d, Procedurat standarde “Rregullat teknike të shoqërimit në polici”.*

thuhet shprehimisht se: *“Personi i shoqëruar nuk trajtohet në të njëjtat kushte me personin e ndaluar ose të arrestuar dhe në çdo rast, shoqërimi duhet të zgjasë deri në sqarimin e çështjes, por jo më shumë se 10 orë”*.

Sa më lart, në vlerësimin e Avokatit të Popullit, prezenca e skarave të hekurit në mjedisin dhe dhomat e shoqërimit, përbën trajtim jo njerëzor dhe jo dinjitoz të personave që qëndrojnë në këto dhoma, ndaj ato duhet të hiqen sa më parë nga këto ambiente.

Në ambientin e shoqërimit nuk kishte dhomë të posaçme për marrjen në pyetje/intervistimin e shtetasve. Në çdo rast, intervistimi i personave të shoqëruar kryhej në zyrat e punës të punonjësve të policisë. Njëkohësisht edhe kryerja e veprimeve procedurale nga oficerët e policisë gjyqësore dhe komunikimi i masës së sigurisë të personave për kalimin nga dhomat e shoqërimit në dhomat e sigurisë, kryhet në zyrat e punës së punonjësve të policisë.

Kjo praktikë, bie ndesh me kërkesat e parashikuara në procedurën standarde në lidhje me kushtet e mbajtjes dhe sigurisë të personave të shoqëruar, ku thuhet shprehimisht se: *“Në mjediset ku pyetet i shoqëruari duhet të jenë të vendosura pajisje e orendi pune për specialistët dhe ndihmës specialistët e policisë si; tavolina, karrige dhe stola për qëndrimin ulur të shtetasve të shoqëruar, të cilat të jenë të fiksuara dhe të pa lëvizshme”*³.

Gjithashtu, edhe intervistimi apo marrja në pyetje e të miturve në konflikt me ligjin që shoqërohen në mjediset e këtij komisariati, kryhej në zyrat e punës të punonjësve të policisë dhe jo në ambiente të veçanta, sikurse është e parashikuar në dispozitat e Kodit të Drejtësisë Penale për të Mitur dhe procedurën standarde⁴.

Nga dokumentacioni për të miturit në konflikt me ligjin, u verifikua se marrja në pyetje e tyre kryhej në prezencë të psikologut të DVP Tiranë, kujdestarit ligjor të të miturit dhe të avokatit mbrojtës.

Në ambientin e shoqërimit, u evidentua se ishin të instaluar kamerat e sigurisë për mbajtjen në vëzhgim të korridorit dhe hyrjes për në dhomat e shoqërimit, të cilat monitorojnë veprimet e punonjësve të policisë gjatë kryerjes së procedurave me personat e shoqëruar brenda mjediseve të policisë.

Nga inspektimi në ambientin e shoqërimit, nuk u gjetën sende apo mjete të tilla, që mund të shërbejnë për kryerjen e vetëvrasjeve të personave apo për kundërveprim ndaj punonjësve të policisë, me përjashtim të prezencës së tepërt të skarave të hekurit.

³ Pika 4, kreu VII “Zbatimi i të drejtave të njeriut dhe siguria për personin e shoqëruar”.

⁴ Kreu VII. Pika 2.1/k e procedurës standarde thuhet se: *“I mituri në konflikt me ligjin gëzon të drejtat e parashikuara në Kodin e Procedurës Penale, si dhe të drejtat e posaçme të parashikuara në Kodin e Drejtësisë Penale për të Mitur”*. I mituri duhet të mbahet në dhoma/ambiente të ndarë nga personat madhorë dhe të ndarë nga të miturit e tjerë sipas gjinisë”.

Ndërsa për periudhën Janar-Shkurt 2023 në regjistër ishin evidentuar të dhënat për 156 persona, nga këto 134 persona të shoqëruar dhe 22 persona të ndaluar apo të arrestuar në mjediset e këtij komisariati, ku saktësisht ishin **141** shtetas madhorë, **4** shtetase gra dhe **11** shtetas të mitur, të cilët ishin në konflikt me ligjin, sipas përcaktimeve të bëra në nenin 109 dhe 112/1 të ligjit “Për Policinë e Shtetit”. Në momentin e inspektimit, në mjedisin e shoqërimit nuk ndodhej asnjë person në cilësinë e të shoqëruarit.

Në ambientin e shoqërimit ishin vendosur postera me të drejtat ligjore të personave të shoqëruar. Në posterat përkatës ishte pasqyruar edhe e drejta ligjore e personave të shoqëruar për të paraqitur ankesa.

Gjithashtu, na u bë me dije se personat e shoqëruar nga policia informoheshin për të drejtat e tyre, që nga fillimi i privimit të lirisë, duke siguruar informacion të qartë verbal në lidhje me të drejtat ligjore/procedurale që ata kanë. **Avokati i Popullit nëpërmjet Mekanizmit Kombëtar kërkon dhënien e kopjes së kartës së të drejtave të personave të shoqëruar**, që në momentin e hyrjes në komisariat, për të garantuar njohuritë e këtyre individëve për të drejtat e tyre.

Nga verifikimi i dokumentacionit në zyrën e informacionit, u konstatua se në këtë komisariat zbatohet detyrimi ligjor i parashikuar në nenin 109/5 dhe 122/5 të ligjit nr.108/2014 “Për Policinë e Shtetit”, i ndryshuar, si dhe në kapitullin VII, pika a.3.4 e procedurave standarde, për plotësimin dhe dhënien e procesverbalit të veprimeve të kryera me të shoqëruarit nga punonjësit e policisë, që ishin ngarkuar me detyrën e kryerjes së verifikimit dhe trajtimit të çështjes përkatëse.

U evidentuan disa praktika, nga ku rezultoi se në përfundim të procedurave dhe veprimeve të kryera nga punonjësit e policisë në Komisaratin e Policisë nr.1 Tiranë, mbahej procesverbali përkatës dhe pasi firmosej, një kopje i jepej personit të shoqëruar dhe një kopje ruhej në arkivën e institucionit.

Ambientet e sigurisë dhe kushtet e tyre

Në Komisaratin e Policisë nr. 1 Tiranë nuk kishte ambiente të sigurisë dhe personat e arrestuar/ndaluar, në përfundim të veprimeve procedurale nga ana e punonjësve të policisë, dërgoheshin menjëherë në dhomat e sigurisë “Blloku i Sigurisë”, ambiente të cilat janë ndërtuar sipas kërkesave të parashikuara në ligjin nr.108/2014 “Për Policinë e Shtetit”, i ndryshuar dhe procedurën standarde “*Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre*”, miratuar me urdhrin nr.925, datë 18.07.2019 të Drejtorit të Përgjithshëm të Policisë së Shtetit. “Blloku i Sigurisë” në Tiranë, është një investim i ri, ku mbahen dhe sigurohen personat e arrestuar/ndaluar nga të gjitha komisaritet e policisë në varësi të DVP-së Tiranë. Funksionimi i “Bllokut të Sigurisë” në Tiranë ka filluar në datë 22.10.2022.

Regjistri i personave të shoqëruar, si dhe trajtimi i të shoqëruarve

Në Komisarariat e Policisë nr.1 Tiranë u konstatua se regjistri i evidentimit të të dhënave për personat e shoqëruar” ishte i tipit “Model nr.1”, konform procedurave standarde “Rregullat teknike të shoqërimit në polici”, miratuar me urdhrin nr.938, datë 24.07.2019 të Drejtorit të Përgjithshëm të Policisë së Shtetit dhe ishte i sekretuar.

Të gjithë personat e shoqëruar në organin e policisë sipas dispozitave të ligjit nr.108/2014 “Për Policinë e Shtetit”, i ndryshuar, regjistroheshin në këtë regjistër nga punonjësit e zyrës së informacionit.

Nga këqyrja e këtij regjistri rezultoi se, koha e qëndrimit në gjendje shoqërimi e shtetasve ishte e ndryshme nga 1 orë deri në 10 orë në raste të veçanta. Rubrikat e regjistrimit ishin plotësuar në mënyrë korrekte, me përgjegjësi dhe saktësi nga punonjësit e policisë⁵.

Në zyrën e informacionit të Komisarariatit të Policisë nr.1 Tiranë ishte hapur një regjistër më vete për evidentimin e të dhënave të personave të mitur të shoqëruar, në bazë dhe të rekomandimit të Avokatit të Popullit për këtë qëllim⁶. Për vitin 2023 ishin evidentuar të dhënat për 11 persona të mitur.

Nga inspektimi u konstatua, se në këtë komisarariat kishte edhe regjistër për evidentimin e kërkesë/ankesave të personave të shoqëruar, të arrestuar dhe të ndaluar, sikurse parashikohet në nenin 115 të ligjit nr. 108/2014 “Për Policinë e Shtetit”, i ndryshuar, por për periudhën që kryhej inspektimi, nga këqyrja e këtij regjistri u evidentuan më së shumti kërkesa për avokat, probleme shendetësore, komunikim me familjarët etj.

Ambientet e intervistimit

Në dhomat e shoqërimit të Komisarariatit nr. 1 Tiranë, nuk ka një dhomë më vete të monitoruar me sistemin e kamerave, që të shërbejë për intervistimin/ marrjen në pyetje të personave të shoqëruar nga punonjësit e policisë, për të cilët ekzistojnë kushtet e përcaktuara në ligj se ka dyshime të arsyeshme që kanë kryer një veprë penale. Në mungesë të kësaj dhome, këta persona merren në pyetje në zyrat e punës të punonjësve të policisë.

Avokati i Popullit e konsideron procesin e intervistimit të personit në një ambient më vete, që të jetë i monitoruar nëpërmjet sistemit të kamerave të sigurisë, si një element parësor për mbrojtjen e të drejtave dhe lirive të njeriut, pasi monitorimi filmik ka efekt parandalues për kryerjen e veprave të dhunshme dhe të dënueshme, si nga ana e të shoqëruarve, ashtu dhe nga vetë punonjësit e policisë së shtetit ndaj tyre.

Lidhur me këto fakte, Institucioni i Avokatit të Popullit i ka rekomanduar në mënyrë të përsëritur, Drejtorisë së Përgjithshme të Policisë së Shtetit dhe Drejtorive Vendore të Policisë, marrjen e masave për krijimin e zyrave të posaçme, për marrjen në pyetje të

⁵ *Kreu VII, Procedurat standarde “Rregullat teknike të shoqërimit në polici”.*

⁶ Rekomandim nr.437 prot., datë 11.10.2019 “Për garantimin e të drejtave të të miturve të privuar nga liria në zbatim të legjisllacionit të ri të administrimit të drejtësisë penale për të mitur”.

shtetasve gjatë kryerjes së veprimeve procedurale nga oficerët e policisë gjyqësore dhe instalimin e sistemit të monitorimit me kamera në këto zyra, por sikurse konstatohet nga inspektimet periodike të zhvilluara nga MKPT, ky rekomandim ende nuk është plotësuar⁷.

Gjithashtu, në Komisarlatin e Policisë nr.1 Tiranë, nuk ka dhomë më vete për intervistimin e personave të mitur në konflikt me ligjin. Mekanizmi Kombëtar e konsideron me rëndësi të veçantë faktin se, intervistat me të miturit duhet të realizohen në një ambient të përshtatshëm dhe të pajisur me orënditë e nevojshme, si tavolina dhe karrige, në një mjedis sa më të qetë, pa shtrëngime fizike dhe presione psikologjike. Në kushtet aktuale që ndodhen zyrat e punës të punonjësve të policisë, intervistimi i tyre mund të shkaktojë traumatizim plotësues të fëmijët.

Ndihma juridike, psikologjike dhe kujdesi mjekësor

Në këtë komisarlat, punonjësit e policisë zbatonin detyrimin ligjor të parashikuar në nenin 109/5 dhe 122/5 të ligjit nr. 108/2014 “Për Policinë e Shtetit”, i ndryshuar, si dhe në kapitullin VII, pika a.3.4 e procedurave standarde “Rregullat teknike të shoqërimit në mjediset e Policisë së Shtetit”, për plotësimin dhe dhënien e procesverbalit të veprimeve të kryera me të shoqëruarit nga punonjësit e policisë, që ishin ngarkuar me detyrën e kryerjes së verifikimit dhe trajtimin e çështjes përkatëse.

Nga inspektimi rezultoi, se për personat e shoqëruar mbahej procesverbali tip “Formulari i raportit të shoqërimit ose ndalimit/arrestimit”. Njëkohësisht, zbatohet detyrimi ligjor i parashikuar në nenet 34/b, pika 2 dhe 251 të Kodit të Procedurës Penale, që të ndaluarit/arrestuarit duhet t’i jepet një kopje e procesverbalit të ndalimit/arrestimit.

Punonjësit e policisë i parashtruan grupit të inspektimit, se në rastet kur të ndaluarit/arrestuarit ishin të mitur, veprimet procedurale kryheshin në praninë e detyrueshme të avokatit mbrojtës të caktuar kryesisht dhe të psikologut. Avokatët siguroheshin nga lista e avokatëve të dërguar nga organi i prokurorisë, ndërsa psikologu sigurohej nga Drejtoria Vendore e Policisë Tiranë. Gjatë verifikimit të regjistrave të personave të shoqëruar u konstatua se procedura e ndjekur nga punonjësit e Komisarlatit të Policisë nr.1 Tiranë ishte zhvilluar konform ligjit.

Në rastet kur të shoqëruarit paraqesin probleme shëndetësore, njoftohet urgjenca në numrin 127, ku menjëherë vjen shërbimi Spitalor Universitar Nënë-Tereza Tiranë për të dhënë ndihmën mjekësore.

⁷ “Një sistem i monitorimit të vazhdueshëm i standarteve dhe procedurave të intervistave të policisë duhet vënë në zbatim, po ashtu; kjo kërkon një regjistrim të saktë të intervistave të personave në ambientet e policisë, të cilat, nëse është e mundur duhet të zhvillohen me pajisje regjistruese elektronike (audio dhe/video). Duhet të kërkohet që të regjistrohet në mënyrë sistematike koha kur ka filluar dhe mbaruar intervista, ndonjë kërkësë të bërë nga i ndaluarit gjatë intervistës, si dhe të personave të pranishëm gjatë çdo interviste.” CPT’ reports; Armenia: Visit 2010[par.18]

Për sa më sipër dhe në mbështetje të pikës 3, të nenit, 63 të Kushtetutës së Republikës së Shqipërisë, ku thuhet se: “Avokati i Popullit ka të drejtë të bëjë rekomandime dhe të propozojë masa kur vëren shkelje të të drejtave dhe lirive të njeriut nga administrata publike”; të nenit 21, germa “b” të ligjit nr. 8454 dt. 04.02.1999 “Për Avokatin e Popullit”, i ndryshuar, ku thuhet se: “Avokati i Popullit paraqet rekomandime për vënien në vend të së drejtës së shkelur tek organi administrativ, që, sipas tij ka shkaktuar shkelje të të drejtave dhe lirive.

REKOMANDOJMË:

1. Marrjen e masave të menjëhershme, për krijimin e zyrës së intervistimit, për marrjen në pyetje të shtetasve gjatë kryerjes së veprimeve procedurale nga oficerët e policisë gjyqësore dhe instalimin e sistemit të monitorimit me kamera në këto zyra.
2. Marrjen e masave të nevojshme, për krijimin e zyrave të posaçme për intervistimin e personave të mitur, duke ofruar një ambient të përshtatshëm, që duhet të jetë i rregulluar në mënyrë të posaçme për zhvillimin e bisedave me të miturit.
3. Marrjen e masave të menjëhershme, për sigurimin e sistemit të ngrohjes ose vendosjen e pajisjeve elektrike në dhomën e shoqërimit, për ngrohjen e këtyre ambienteve kryesisht në periudhën e dimrit.
4. Marrjen e masave të menjëhershme, për pajisjen e dhomave të shoqërimit me orenditë e nevojshme, si tavolinë, karrige, për qëndrimin e personave të shoqëruar në konflikt me ligjin.
5. Marrjen e masave të menjëhershme, për mirëmbajtjen e dhomave të shoqërimit, lyerjen e tyre dhe garantimin e kushteve higjieno-sanitare të tualetit dhe të ambienteve të tjera të Komisarariatit të Policisë nr.1 Tiranë.
6. Marrjen e masave të menjëhershme, për heqjen e skarave të hekurit në korridorin e dhomave të shoqërimit, pasi përbën trajtim jo njerëzor dhe jo dinjitoz të personave që qëndrojnë në këto dhoma, si dhe shërben si një formë presioni psikologjik, dhe si premisë për kryerjen e vetëvrasjeve të personave të shoqëruar apo për kundërveprim ndaj punonjësve të policisë.

Për qëndrimin dhe masat që do merrni në zbatim të këtij rekomandimi, kërkohet të vihemi në dijeni brenda afatit **30 ditë** sipas nenit 22 të ligjit nr.8454, datë 04.02.1999 “Për Avokatin e Popullit”, i ndryshuar.

Duke besuar në mirëkuptimin dhe bashkëpunimin tuaj,

KOMISIONER

Ahmet PRENÇI